

LA LUNO E LIS OSTE DE L'ESTABLOUN

La luno sounjarello
Risié dins l'establoun ;
Gisclavo, douço e bello,
De milo trauquihoun. (bis)

Es aqui que veguèron
Pèr oste un ase e un biòu,
E pèr moble trovèron
Unjas de paio au sou.(bis)

La luno sounjarello
Ris plus dins l'establoun ;
Un nivo de la bello
Tapo lou lumesoun. (bis)

O luno raubadisso,
Perqué 'scoundre ti rai ?
Souto aquelo téulisso
Vai naisse l'Adounai (bis)

Nàni, l'escuresino,
La fau dins l'establoun;
D'aise acò se devino :
L'errour èro d'à foun. (bis)

Mai aquelo soumiero
S'esvalira bèn lèu ;
Dins la pauro feniero
Pouchejo un bèu soulèu. (bis)

O luno sounjarello,
. Tapo toun lumenoun :
Unoluno plus bello
Intro dins l'establoun.(bis)